

与卷

分類詩

詩學要訣

重編留青新集

重編留青新集卷五

分類詩上

年壽

科第

婚嫁

年壽類

上時相壽五首

許景衡

閒看暖律幾時回。已覺陰雲四面開。萬物定知春色近。三台今引歲星來。說拈彩筆題詩句。端爲蒼生祝壽杯。師保從來周召事。直須兩兩位公槐。年年燕喜倍光榮。蘭玉稱觴滿相庭。信宿尙餘元夜月。上台却是老人星。包荒度量侔河嶽。蓋世功名在典刑。一語堪爲我公壽。聖賢相與合千齡。清淨端爲物外仙。經綸猶有世間緣。坐令四海渾無事。付與羣生大有年。南極老人今日見。西樓明月夜來圓。吾君萬壽公同德。綠髮朱顏照冕蟬。槐庭三入妙經綸。百度分明又一新。上欲無爲成至治。天教難老爲斯民。川塗蕩蕩初消凍。草木欣欣各自春。誰信塵埃尙羈旅。四年企首望洪鈞。上帝分明憫下民。挺生賢傑在斯辰。蓮花葉上青髯老。萱草堂前豔蕊春。盡閱摺紳歸藻鑑。頻教動植入陶鈞。古今多少調羹手。獨見緇衣有世臣。

賀生日詩

慶系來從沁水園。勳門婦德衆稱難。舊聞孟母無欺語。新得嫦娥不老丹。行見綵衣添袞繡。更饒文砌擁芝蘭。却須剩種黃金菊。留待年年獻壽看。

戊午壽國舉兄

陳傅良止齋

一母分身四白頭。從今家事付兒流。只須老草供觴咏。乍可婆娑伴釣遊。勞世萬人輸暇日。好天一雨薦新秋。平章何物宜爲壽。三十餘年晏子裘。

丁巳壽國舉兄

歲自爲詩歲自賡。愁無新思思還生。更從今閨書初伏。待看何年值後庚。漢網疎如天地闊。奎文下與水雲平。弟兄長健貧何病。判解金龜當一醒。

壽潘省之

泛水淺紅荷十里。蔽雲濃綠木千章。旁無俗子同居巷。中有臞仙一瓣香。今夕還知是何夕。吾鄉終勝似他鄉。雙鳧便合青冥上。笑看兒孫落未央。

壽薛象先

蕭然山澤一臞仙。故被聲名絆俊躔。祇爲春秋同社燕。遂歸風雨對床眠。中年曾未鬚眉白。盡日全無車

馬喧。我有壽觴誰與共。會昌湖上釣魚船。

以兩鶴壽薛象先

日與山農共一廬。不應家有四乘軒。殷勤分送平齋下。爲看蟠桃熟幾年。

壽叔祖母

與先人同生

三陽昨夜轉洪鈞。鳳歷今年又紀寅。再拜與君觴壽母。更生猶我祝先人。兒孫夾侍渾忘數。梅柳前陳不記春。從此常爲湯餅主。賸看諸婦抱麒麟。

壽胡編校

劉 黻 聖伯

嶺根逢誕日。相對意如何。直道遭時少。清貧得壽多。仙桃丹已熟。鄰林味方和。休說南冠事。窮通付浩歌。

壽王鑑明五十

吳偉業 梅村

伏勝謝生徒。開壁藏卷軸。桓榮抱詩書。拾梧逃巖谷。古來兩經生。遭亂耽講讀。後皆保期頤。或乃致鼎足。當世數大儒。如君號名宿。通識曉世變。早計駭愚俗。一朝載妻子。推車入天目。經營志不遂。退迺就田牧。十畝種桑麻。一溪蒔花木。果茹飴兒孫。樵蘇課童僕。以代子陵釣。無愧君平卜。俯視悠悠人。愁苦對金玉。下士豈聞道。世事如轉轂。五十知天命。養生在無欲。全家就白雲。避地驅黃犢。無以侑君觴。知足則不辱。

壽繼起和尚

故山東望路微茫。講樹秋風老著霜。不羨紫衣誇妙相。惟憑白足徧諸方。隨雲舒卷身兼杖。與月空明詩一囊。台頂最高三萬丈。道人心在赤城梁。

大中丞心康韓公九月還自淮南生日爲壽

閨闔清秋爽氣來。尙書新自上游回。八公草木登高宴。九日茱萸置酒臺。兵食從容經久計。江淮安穩濟時才。尊前好唱南山曲。笳鼓西風笑語開。

贈李膚公五十

先德傳家歷苦辛。汗青零落剩閒身。雲山笑傲容遺叟。松菊招尋見故人。猶有田園供伏臘。豈無書卷慰沈淪。只看五月開尊宴。撥刺江魚入饌新。

題海虞孫子長七十壽圖

春秋注就授生徒。虞仲祠前一老夫。鳥几看雲吟菌閣。布帆衝雨過菱湖。空山撫操彈三峽。故國興懷賦兩都。同輩半非身健在。爲誰寫入鍊丹圖。

壽王子彥五十四首

二十登亭侈壯遊。軟塵京雒紫驂驄。九成宮體銀鉤就。萬卷樓居玉軸收。縱解楊蒲非漫戲。即看鮑叔亦風流。荀興芒屨春山路。故舊相逢總白頭。

舊業城西二頃田。著書聞已續長編。兩賢門第知應補。十上才名祇自憐。投老漫裁居士服。畏人還趁孝廉船。只因梅信歸來晚。手植松枝暗記年。懶將身世近浮名。殘客繇來厭送迎。獨處意非關木石。逢人口不識杯觴。衣帽隨霜多風雅。硯几清嚴見性情。子弟皆賢實從好。似君纔勿愧平生。雖云文籍與儒林。獨行居然擅古今。五簋留賓高士約。百金投客故人心。尊彝布列圖書貴。花木蕭疎池館深。晚向鹿門思采藥。漢濱漁父共浮沉。

壽陸孟龜七十二首

楓葉蘆花霜滿林。江湖蕭瑟鬢毛侵。書生藤峽功名薄。漁父桃源歲月深。入市懸壺長賣藥。閉門殘酒夜橫琴。舊游烽火天涯夢。銅鼓山高急暮砧。講授山泉遠戶庭。苧翁無事爲中冷。偶支鶴俸分魚俸。閒點茶經補水經。千里程鄉浮大白。一官勾漏養空青。歸來松菊荒涼甚。買得雙峰縛草亭。

壽申司農青門六十二首

相門三戟勝通侯。兄弟衣冠盡貴游。白下詩名推謝朓。黃初耆德重揚彪。千山極目風塵暗。一老狂歌天地秋。還憶淮淝開制府。江聲吹角古揚州。

脫却朝衫上釣船。餘生投老白雲邊。買山向乞分司俸。餉客還存博士錢。世事烟霞娛晚歲。黨人名字付殘編。扁舟百斛烏程酒。散髮江湖任醉眠。

壽座師李太虛先生四首

放懷天地總浮鷗。客裏風光爛漫收。一斗濁醪還太白。二分明月屬揚州。錦箏士女觴飛夜。鐵笛關山劍舞秋。猶有壯心消未得。欲從何處訪丹丘。
好客從無二頃田。勝游隨地記平泉。解衣白日消茶局。岸幘青山入釣船。故國風塵驚晚歲。天涯歌舞惜流年。篋中別有龍沙記。不許旁人喚謫仙。
讀易看山愛息機。閉門芳草雁還飛。江湖有夢爭南幸。滄海無家記北歸。煙火一竿思舊德。兵戈十口出重圍。杜陵豈少安危志。老大飄零感布衣。
廬頂談經破碧苔。十年不到首重回。風清鐘鼓吳山出。雪黑帆檣楚雨來。痛飲長江看自注。異書絕壁訪應開。芒鞋歸去身差健。白鹿諸生掃講臺。

李青城七十有六以自壽詩積閏平分已耄年之句索和余題一絕贈之

詞家老宿號山農。移得青城八九峰。細數餘分添甲子。黃楊千歲敵喬松。

猶憶花前酒數升。菊門秋色月初澄。何當折節招徐孺。却喜登龍識李膺。百代羽儀真御史。一時蹇謬古中丞。覽揆不作尋常祝。萬丈喬松玉井冰。

五月二日生日有感

鳳鶚大鴻

又是江南梅雨天。此生逾壯思悠然。矜張久厭宣明面。草澤誰知正禮年。情類疲牛踏陳跡。身如社燕寄修椽。佳時畢竟推吾土。樹外雲峯對榻眠。

壽孫母鄭太君

元侗

詩人稱壽母。冰操更堪誇。甘旨怡黃髮。經書傳絳紗。堦蘭森玉樹。珂里駐香車。停看三山鳥。來貽九節花。祝楊以齋少司馬七十

王暉丹

南極星何朗。東山興未移。行藏符至道。勳績盛當時。蕊榜高名捷。花封美政宜。飛鳧翔嶺嶠。鳴鳳集天池。左掖傳封事。中朝作羽儀。黔雲橫壁壘。洱海接旌旗。萬里銷兵氣。三年借撫綏。論功方卜相。將母竟過辭。門大懸車早。身強倚杖遲。玉環垂世澤。琪樹盡佳兒。幸附千秋業。曾編九老詩。躋堂今獻壽。香滿桂花枝。祝方渭仁太史七十

高名久重玉堂仙。歸去田園樂事全。史筆三長原獨擅。年華七十任君傳。酒中泛菊顏常駐。松下攤書手自編。明歲登高應更健。懸知杖履復翩翩。

壽某明府

夏基樂只

陽春十月翠華收。松柏爭輝南極樓。雲擁山城開五色。桃蟠花縣熟千秋。庭前士競堯封祝。澤畔民展海屋籌。不必據圖夸鄭奐。高堂寶錦列卿侯。

壽吳母

婺宿星初度。時逢大有秋。金桃思獻祝。玉樹正當樓。座列屏山秀。人添海屋籌。雪璫豐爛熳。阿母降瑤邱。

祝傅雨臣給諫五秩壽

俞灝可庭

帝寶稱良弼。初當服政年。英聲蜚瑣闥。封事動堯天。報國青蒲裏。怡親綵服前。黑頭應作相。休更羨瀛仙。

壽陳母五十

姑射神仙冰雪姿。書長護草碧如絲。堂開綺席來青鳥。人看華燈飲玉卮。令子已占星聚井。諸孫又見鳳生池。柏舟貞節應堪表。會駕潘輿采紫芝。

祝陳簡侯七十

馬銓蓮素

名場酣戰久。垂老臥林邱。翰墨雞林重。文章豹采搜。樽前浮綠蟻。花下吐丹榴。居傍吳山勝。何勞蓬閣求。

祝某夫人

嚴儀煌令輝

南極星初現。西池宴復開。雙星天上迥。彩鳳日邊來。花繞芙蓉嶼。香飛鸚鵡杯。百年方宴爾。笙鶴下蓬萊。

壽張母沈夫人壽

陳 昌 聚 曾

曾聞婺宿駕瓊樓。屈指今逢初度秋。曼福已膺天錫嘏。遐齡自報海添籌。稱觴繞膝皆夸鳳。倚杖含飴不藉鳩。此日祥麟知有讌。麻姑早已降瀛洲。

祝陸母潘太夫人七十

張道升 慎 高

畫閣鳴環珮。珠樓接翠微。雲飛王母使。日映老萊衣。鶴髮人間瑞。冰輪天上輝。芝蘭吾亦愛。不羨板輿歸。

壽程太孺人六十

汪壯猷 梅 溪

錦幌高懸日。黃花爛熳開。祥光環列戟。斑綵映三台。里著鳴珂盛。庭盈作棹才。聖朝弘錫類。綸綍九天來。

朱平長封翁暨太母九十雙壽

汪以澄

白髮修然九十春。齊眉相對醉芳辰。山花萬疊扶鳩杖。門柳千絲映葛巾。滿室封章金燦爛。盈庭蘭蕊玉嶙峋。紫陽家學傳書遠。歲捧瑤觴祝大椿。

俞復齋先生偕章夫人雙壽

壽則韓 西 安

雙星並耀彩雲祥。靄色榮開畫錦堂。自有蟠桃盛玉盃。豈無仙酒泛霞觴。萊衣膝下成駉驥。桂子階前引鳳凰。爲羨齊眉人未老。羽衣鳩杖漫相將。

祝談如先生百歲陰壽

鄭雲龍 靈 池

遙憶蓬壺日月長。百齡也合進霞觴。列星雖已歸箕尾。彩服依然獻玉堂。北海樽開思笑語。南山歌罷設衣裳。漫云蘭桂膺天眷。掩映餘輝奕葉芳。

祝簡侯七十

朱文震

節近懸弧日。葵花映彩觴。畫同眉壽永。算並縷絲長。意氣高千古。詞華傑七襄。臨風聊寄意。俚句愧康輿。

壽朱平長

馬世濟

老人在南極。紫氣自東來。世業傳精舍。高風軼釣臺。香闥桂子下。綵舞菊花迴。願學岡陵祝。遙稱獻壽杯。

俞樸菴尊堂九十壽

陳德裕

五福先純嘏。千秋頌母儀。相君敷化雨。教子顯清時。蒼葦伴芝草。瑤池映鳳池。自慚蘭譜未。願獻紫霞卮。

祝某邑侯夫人

華治璧

共道絃歌好。還知同治良。柳深偕度曲。花滿各分香。步月隨鳬影。停針待繡裳。苔溪流不盡。醴酒祝無疆。

德定圃先生卸漕院事巡撫閩中與夫人雙壽索詩四首

袁枚

蕭何轉漕卸雙旌。囊袞頒春到越城。半壁東南恩已徧。六旬花甲歲初更。文章自得中和氣。瀟灑兼辭幹濟名。此日軍門牙纛靜。花苗螺女盡懽聲。

憶昔追隨步木天。一番春夢尚依然。後生許我稱名士。前輩斥公更少年。閭闔門多鸞振翼。溪山秋老鶴

歸田蓬萊久別還相認。邂逅揚州又拍肩。

儂家仲氏學吹簫。也領春風侍絳帷。玉鑑冰衡無遺物。珊瑚鐵網有高枝。生徒負笈來千里。兄弟焚香禮一師。常共子由聽雨坐。歐陽門下說恩知。

徵詩箋到士林聞。爭寫瑤池錦繡文。共仰金縷飄綠髮。更看王母擁紅雲。花開並蒂春雖老。酒進雙巵飲易醺。慙愧袁絲相隔遠。吹簫輸與武夷君。

望山尚書以七十生辰作相仍督兩江奉賀四首

久遲枚卜識君恩。留與先生慶七旬。調鼎人來雙鳳闕。稱觴花滿一家春。韋平兩世黃扉業。伊呂三朝白髮身。同是祝公無量壽。自天傳下語才真。

紫禁城頭駐玉車。青宮深處女兒家。萬釘寶帶天邊賜。十部笙歌宅裡譁。北面公侯爭把盞。東床帝子替簪花。休誇與佛同生日。轉恐光榮佛尚差。

生與南邦最有緣。四回江上月重圓。兒童竹馬頭成雪。官舍甘棠樹拂天。聽說相公還借寇。喜教士女更留仙。齊聲擬向君王奏。一个蒼生乞一年。

三公在外學張溫。詩識真如弟子言。新築沙堤迎使節。剛調梅雨到江村。西清趨侍身雖遠。東閣常登客亦尊。欣染名山一枝筆。他年還紀杖朝恩。

彭芝亭大司馬八十索詩

畫錦堂開八秩樽。卿雲光彩耀吳門。人間元老三朝少。海內靈光一殿尊。玉尺已裁賓字簿。金針還與故鄉論。文昌雜錄科名記。首說鰲頭兩祖孫。領袖青華五十霜。文人中有郭汾陽。曾官樞密威常在。再宴瓊林話正長。屈指東南誰伯仲。滿朝金紫半門牆。乞歸更荷君恩重。許住平泉水竹莊。尙書風貌鶴同清。瀟洒何曾似六卿。樓起三層雲對坐。集成一品世孤行。仙郎已擅朝中貴。佛子還從膝下生。佇看蟠桃親手採。家風真不愧彭鏗。師生弱冠受恩知。也復蕭蕭兩鬢絲。冒雨常迎嚴武駕。憐才屢和樂天詩。只因路隔江波遠。未免籌添海屋遲。蒲柳尙因松柏茂。他年扶杖祝期頤。

三月二日八十自壽

自笑將開九秩筵。挽詩翻在壽詩先。剛修禊事傾三雅。再宴瓊林欠四年。瀟洒一生無我相。逢迎到處有人緣。桑榆晚景休嫌少。日落紅霞尙滿天。白雲深處白鳬翁。尙記髫年入泮宮。賈誼登朝纔弱冠。趙元父手揖三公。金蓮花燭家家羨。南國甘棠樹樹紅。一日慈烏思反哺。搖鞭不待管絃終。

買得青山號小倉。一邱一壑自平章。梅花遶屋香成海。修竹排雲綠過牆。嵌壁玻璃涵世界。張燈星斗落池塘。上公誤聽林園好。來畫盧鴻舊草堂。

卅載承歡鬢已星。萊衣舞罷此身輕。千重越嶺看花去。兩度天台采藥行。倭國都來購詩稿。佳人相約拜先生。九州不信吾還在。陽五都疑古姓名。

甲乙丹黃萬卷餘。兒孫珍重好家居。但看手澤應思我。莫爲科名始讀書。平子四愁能自遣。香山三泰有誰如。此翁事事安排定。生家營成傍草廬。

欲爲遲郎賦感婚。卽將此日卜良辰。蟠桃會上看新婦。玉鏡臺邊祝大椿。白髮粧成三女粲。好風吹滿一家春。寶梁乳燕雙飛處。添箇堂前問字人。

一枕黃梁夢太長。憑人喚醒又何妨。烟雲起滅山還在。桃李榮枯松自蒼。不解鼻盧呼夢道。愛藏金石學歐陽。寶公他日西湖召。擬獻周官樂幾章。

逢花逢月客誰招。碩果晨星逐漸凋。怕過山陽聽玉笛。懶從酒店贖金貂。牡丹艷艷開三月。聖世看看歷四朝。倘把光陰掄指算。占人多少可憐宵。

閨中妻老尙齊眉。冷煖常先侍者知。同榜一人惟首相。及門五代見孫枝。詩多幸賴辭官早。累少全虧得子遲。更喜女嬰還健在。白頭閒坐說兒時。

尚書小楷尚登樓。滴露研朱事未休。清福已經消半世。虛名遑敢望千秋。貧能行樂仙應妬。老不逃禪佛亦愁。擬乞壽言何處乞。抽毫先向自家求。

穀人祭酒七十壽詩二首

伊秉綬 組似

十八科前仙侶稀。魯靈光特聳清儀。詞林望是儒林望。國子師原冑子師。蓮炬封餘韓氏篋。弓衣織就白家詩。年年玉露銀河夕。早桂香中介一卮。少說漁洋公老成。並留陳迹綠楊城。暮年未免應劉感。門下多從籍湜名。絲管千觴娛北海。文章一代重西清。正逢續集編成日。壽在綿綿士女情。

壽李松雲前輩五十生辰二首

吳錫麒 敬

要共桃花醉一觴。玉堂不戀況黃堂。未凋綠髮功名早。能住青山歲月長。春滿南陔長香草。人來東海說甘棠。笑予亦得歸身乞。負米徒誇腰脚強。高論如聞海上琴。今人顏色令人心。名花闌檻栽培盛。老樹風烟閱歷深。詩札奇應煩日下。酒船來恰自山陰。祝君惟有千秋在。名字先傳著作林。

壽沈梅村六十二首

料理歸田計早成。優游六十漸忘名。宦途手版黃梁夢。詩客頭銜白水盟。松菊荒涼勞覓隱。齋園淡泊苦

謀生一癩祇有烏程酒能似先生到底清
我到君家便泊舟。君來我里亦能留。詩狂酒渴雙青眼。女嫁男婚兩白頭。有約結鄰西郭近。何來種秫薄
田收。仙山樓閣原無際。且著芒鞋賦近游。

科第類

賀史立菴狀元及第

沈鼎新 自玉

金臺挾策破洪濤。冀北羣空倩彩毫。盧肇是龍今奪錦。拱辰非魯已登鰲。三千字首三台曜。九萬風乘九
宴高。憶昔師門同點額。終看燒尾屬吾曹。

賀楊接三聯捷

陳張曾 衣聖

聯鑣杏萼跨雕鞍。倚馬宏才策治安。兩宋科名先仕路。三楊相業望朝端。雲呈五色臚傳現。花列千行贊
道看。珠榜仙郎年獨少。分輝同學慶彈冠。

賀登賢書

鎖殿香飄桂蕊清。喧傳東海得蕭生。溟池暫息三秋翮。霄漢驚看一日鳴。上苑花飛斑管飽。長安雪盡紫
騮輕。揚雄應有甘泉賦。好待春風玉殿行。

賀姜金和鄉薦

吳 敬

人言平步上天難。我看先生只等閒。鵬翮却從高處舉。桂花先向上頭攀。文章不必朱衣點。姓字應將白玉刊。待看來年消息好。馬蹄三月踏長安。

賀范用章入武泮

張丁雲 龍升

才名補入兔罝篇。芹藻風流亦藹然。自有胸中兵百萬。何須帳下甲三千。輕裘緩帶年方少。羽扇綸巾志獨先。還看雲鵬連翮起。東西賢閣共翩跹。

賀士毅德世兄鄉薦

陳捷 月三

香飄桂蕊棘闈清。占得丹枝洵有名。自昔文章驚國士。而今聲譽重宸京。鵬飛雲漢三秋翮。鶚薦沖霄一日鳴。遙望南宮爭射策。春風玉殿聽雷聲。

賀沈鴻舉兄入泮

吳江春樹色蒼蒼。遙映青袍翠影長。緒繼司空金紫貴。才驚國士白眉揚。蟾宮桂子爭先折。棘苑簪花分外香。想自休文多逸致。至今雲漢盡天章。

賀沈大珩舉進士

胡文潯

錢唐才子看花來。帝里風光接上台。給札應承金馬詔。賦詩早到柏梁臺。天橋日暖宮花近。漢苑春深禁柳開。憶昔當年多感慨。彈冠莫遣髯華催。